

পবিত্ৰ ইঞ্জিল শৰিফ ১৮ নম্বৰ ছিপাৰা

আল-ফিলিমন

পৰিচিতি

আল্লা পাকৰ হুকুমে হজৰত ইছা আল-মসীৰ খাছ সাহাবি হজৰত পাউলুছে (রা:) অউ ছিপাৰা লেখছইন। হজৰত ইছায় বেহেস্তো তশৰিফ নেওয়ার অনুমান ২৭ বছৰ বাদে ইখান চিঠিৰ আকাৰে লেখা অইছে।

হজৰত ফিলিমন আছলা ইছা আল-মসীৰ একজন নামকরা উম্মত। তাইন কলোছি টাউনৰ ইছায়ী জমাতৰ এক জন। অনিছিম নামে তান এক খরিদা গুলাম আছিল। হজৰত পাউলুছ (রা:) য়েবলা জেলো বন্দি আছলা, অউ সময় অনিছিম তার মুনিব ফিলিমনৰ গেছ থাকি বাগিয়া কনু ছুৰতে পাউলুছৰ গেছে আইছিল। হজৰত পাউলুছৰ মাজদিয়াউ অনিছিম ইছায়ী ইমানদাৰ হিসাবে পাউলুছৰ একজন বিশেষ খাদিম অইছইন। তারা দুইওজনে পরামিশ করলা, অনিছিম তান মুনিব ফিলিমনৰ গেছে ফিরিয়া যাইবা, আর তান আগর ভুল স্বীকার করিয়া মাফ চাইবা। হজৰত পাউলুছে ফিলিমনৰ গেছে অনুরোধ করি লেখলা, তাইন যানু তান আগর গুলামৰে ফিরত নেইন আর অখন খালি গুলাম হিসাবে নায়, একজন ইছায়ী ভাই হিসাবেও সমজিয়া নেইন।

অউ ছিপাৰাত দেখা যায়, গুলাম আর মুনিবৰ মাজে কনু ভেদাভেদ নাই, হজৰত ইছায়ী উম্মত অওয়ার বাদে হকলউ এক সমান। আর জমাতৰ মুরব্বি নেতা হজৰত পাউলুছে সাধাৰন মুমিন অকলৰ উপরে নেতাগিরি, হুকুমদারি না করিয়া বরং নিজৰে নিচা করিয়া জমাত অকল চালাইরা। তান মাজে কনু বেটাগিরি বা বড়াই-বাহাদুরি নাই।

এরমাজে আছে,

- (ক) হজৰত পাউলুছৰ ছালাম ১:১-৩ আয়াত
(খ) হজৰত পাউলুছে ফিলিমনৰ তারিফ করলা ১:৪-৭
(গ) অনিছিমৰে ফিরত নেওয়ার লাগি অনুরোধ ১:৮-২১
(ঘ) হজৰত পাউলুছৰ শেষ কথা ১:২২-২৫

১ আমি পাউলুছ, ইছা আল-মসীর লাগি বন্দি আছি। আমি আর আমার ভাই তিমথিয়ে, আমার লগর তবলিগকররা মায়ার দুস্ত ফিলিমনর গেছে লেখরাম। ২ বইন আফিয়া, আমার লগে ইমানর যুদ্ধা আর্খিপাছ আর তুমার বাড়ির জমাতর হকলরে ছালাম জানাইরাম।

৩ আমার গাইবি বাফ আল্লা পাকে আর হজরত ইছা আল-মসীয়ে তুমার উপরে রহমত আর শান্তি নাজিল করউক্কা।

হজরত পাউলুছে ফিলিমনর তারিফ করলা

৪ আমি হামেশা মুনাজাতর সময় তুমার কথা ইয়াদ করিয়া আল্লার শুকরিয়া আদায় করি। ৫ কারন হজরত ইছা আল-মসীর উপরে তুমার ইমান আর পাক বন্দা অকলর বায় তুমার মহব্বতর কথা আমি হুনছি। ৬ আমি দোয়া করি, মুমিন অকলর লগে তুমার খাতির-সম্পর্ক আরো বাড়উক। তুমি তো জানো, আল-মসীর খাতিরে আল্লায় আমরা কতো ভালা ভালা নিয়ামত বিলাই দিছইন। ৭ ভাই, তুমার মহব্বত দেখিয়া আমি খুব খুশি অইছি আর উৎসাহ পাইছি, তুমি তো আল্লার পাক বন্দা অকলর দিলো আরাম দিছো।

অনিছিমরে ফিরত নেওয়ার লাগি অনুরোধ

৮ তুমার ই ভাব দেখিয়া আমি তুমারে এখান কথা কইতাম চাইরাম। আমি তো আল-মসীর নামে তুমারে হুকুম দিতাম পারলাম অনে, তুমার কাম পুরা করার লাগি। ৯ অইলে মহব্বতর খাতিরে হুকুম না দিয়া তুমারে মিনত করিয়ার। আমি পাউলুছ অউ মুরকিব বয়সো আল-মসীর লাগি বন্দি হালতে তুমার গেছে ই মিনতি কররাম। ১০ আমার আওলাদ অনিছিমর লাগি আরজি জানাইরাম, আমি জেলো বন্দি থাকা হালতে হে ইমান আনিয়া আমার আওলাদ বনিগেছে। ১১ এক সময় তুমার গেছে হে বেকামা আছিল, অইলে অখন আমার আর তুমার গেছে হে বউত কামাওরা বনিগেছে।

১২ যাই অউক, আমার জানর থাকি বেশি মায়ার অউ মানষরে আমি তুমার গেছে ফিরত পাঠাইরাম। ১৩ আমি তারে আমার গেছে রাখতাম চাইছলাম, যাতে খুশ-খবরির দায় বন্দি হালতে তুমার অইয়া হে আমার

খেজমত করতো পারে। ১৪ অইলে তুমার ইজাজত ছাড়া আমি কুস্তা করলাম না, যাতে জুর করিয়া তুমার ভালা কাম আদায় করা না লাগে। আমি চাইরাম, তুমি নিজ থাকিউ অউ কাম করো। ১৫ তুমি যাতে চিরকালর লাগি তারে ফিরিয়া পাও, অইতো পারে অউ কারনেউ হে তুমার গেছ থাকি থুড়া দিনর লাগি হরিয়া আছিল। ১৬ অইলে তুমি অখন তারে আর গুলাম হিসাবে পাইতায় নায় বরং গুলাম থাকি বড়, মানি মায়ার ভাই হিসাবে পাইবায়। খাছ করি হে আমার খুব মায়ার মানুষ, অখন তুমার গেছেও হে আরো মায়ার, খালি রক্ত-মাংসে নায়, ইমানদার ভাই হিসাবে মায়ার।

১৭ এরদায় তুমি যুদি আমারে একই ইমানর ভাগি জানো, তে আমারে যেলা কবুল করার কথা, তারেও অলা কবুল করিও। ১৮ হে যুদি তুমার কুনু খেতি করিয়া থাকে আর তার গেছে তুমার কুনু পাওনা থাকে, তে মনো করিও, ই পাওনা তুমি আমার গেছে পাও। ১৯ আমি পাউলুছে নিজর আতে লেখিয়া জানাইরাম, তুমার পাওনা আমি দিলাইমু। আসলে আমি কইতাম চাইরাম না যে, তুমার নিজর জানর লাগিউ তুমি আমার গেছে রিনি আছে। ২০ ভাই ফিলিমন, আল্লার ওয়াস্তে এখন কাম করো, একজন ইমানদার ভাই হিসাবে আমার জানো আরাম দেও। ২১ তুমি আমার কথা রাখবায় জানিয়াউ, তুমার গেছে অউ চিঠি খান লেখলাম। আমি মনো করি, আমি যেতা করার লাগি কইরাম, এরথাকি বেশি তুমি করবায়।

হজরত পাউলুছর শেষ কথা

২২ হুনো, আরো এখন কথা কইরাম, তুমি আমার লাগি মেহমানর কুঠা ঠিক করিয়া রাখিও। কারন আমি আশা কররাম, তুমার দোয়ার উছিলায় আমারে তুমার গেছে ফিরত দেওয়া অইবো।

২৩ আবু-ফারাছে তুমারে ছালাম দিছইন, তাইন ইছা আল-মসীর লাগি আমার লগে অইয়া বন্দি আছইন। ২৪ আর আমার লগর তবলিগকারি মার্কুছ, আরিস্তাকুছ, দিমাছ আর লুকেও তুমারে ছালাম জানাইরা।

২৫ আমরার হজরত ইছা আল-মসীর রহমত তুমার দিলো কাইম রউক। আমিন॥